



Varios centos de persoas, dúas mil segundo a organización, marcharon este domingo polas rúas de Vigo en reivindicación do dereito da muller a decidir sobre o seu corpo e a súa sexualidade. Unha marea lilá camiñou, nunha mañá de calor, propicia para encher as praias, deixando claro o forte rexeitamento social que esperta o recorte do dereito ao aborto que implicaría a aprobación do proxecto deseñado polo Ministerio de Xustiza. Todo nunha semana na que [o Goberno acelerou os trámites legais e consultivos da contrarreforma](#) (o venres o Poder Xudicial aprobou o seu informe, e o mércores a lei pasou polo Consello Interterritorial do Sistema Nacional de Saúde), [para deixala durmir até setembro](#), cando se iniciaría o seu debate no Congreso.

A marcha, convocada pola [Plataforma Galega polo Dereito ao Aborto](#), partiu pouco despois das 11.30 das estación de ferrocarril, onde as manifestantes viguesas agardaban por aquelas que chegaban doutras zonas do país. Dende o Areal, a mobilización camiñou por Concepción Areal, Montero Ríos, Cánovas del Castillo, Carral, Gamboa, Oliva, Palma, Triunfo, Praza da Constitución e Porta do Sol. Alí Isabel Risco leu un manifesto e celebrouse unha asemblea aberta. A seguir, comezou un xantar popular e a romaría lilá, coas actuacións de Habelas Hainas, The Tetras' Van e Sonia Lebedynski.

Na presentación dos actos deste domingo, as representantes da Plataforma destacaron que “a reforma normativa que o PP pretende implantar nega e penaliza o dereito das mulleres a

decidiren libre e responsablemente sobre a súa maternidade", ademais de supor "unha dobre discriminación por razón de xénero e de clase social, porque aquelas mulleres que teñan recursos saíran ao estranxeiro e as que non os teñan arriscarán a súa saúde e vida recorrendo a un aborto clandestino". "Berrarémoslles ao Partido Popular e ao señor Feijoo que non imos parar, que esta é unha loita fundamental para frear a agresión continua aos nosos dereitos como mulleres e como cidadás", concluíron as representantes da Plataforma.

En moitos momentos dos últimos meses, pareceu que o Goberno e o propio ministro Gallardón estivese controlando os tempos, acelerando ou arrefriando o proceso, en función das circunstancias. Por exemplo, varias semanas antes dos comicios europeos do pasado 25 de maio, o desenvolvemento do proxecto detívose, ante o prexuízo electoral que lle podía provocar ao PP. Agora semella que o Executivo aproveitará precisamente o verán para acelerar a súa tramitación, en espera dunha desmobilización dos colectivos e plataformas opostas ao recorte. De aí a importancia desta marcha, que buscaba manter a mobilización social. Porén, Pilar Estévez, unha das voceiras da Plataforma, ante o desgaste que este proceso pode ter para o partido gobernante, preguntábase: "o PP está en condicións de seguir perdendo apoio electoral?". Estévez destaca que "socialmente estamos nun momento en que a xente non cala. E sobre todo as mulleres".

A manifestación buscaba amosar "a unidade e a enerxía de todas as mulleres galegas", xa demostrada en anteriores mobilizacións. De feito, a data escollida para esta marcha quería tamén conmemorar o primeiro aniversario [da primeira gran mobilización convocada pola Plataforma Galega polo Dereito ao aborto, en xuño de 2013](#)

. O pasado 9 de marzo a praza da Quintana [encheuse noutra gran manifestación polo aborto libre e gratuíto](#)

.

Ao Consello de Estado

O PSOE presentará este luns unha proposición non de lei no Congreso na que lle esixe ao Goberno que remita a contrarreforma da lei do aborto ao Consello de Estado, dada a "conflitividade" e a "confrontación social" que provoca a proposta do ministro Gallardón. Anunciouno este domingo a secretaria de Igualdade do PSOE, Purificación Causapié, que lembrou que en 2010 o Consello de Estado xa elaborou un informe favorable da lei de 2010. Causapié cre que, aínda que os seus ditames non son preceptivos, o órgano consultivo debería tamén agora analizar esta reforma que cuestiona "a liberdade, a vida e a saúde das mulleres".